



Broj: **01/2a-50-3-2-32/13**

Sarajevo, 6.3.2013.

ZABILJEŠKA

sa sastanka članova Komisije za vanjske poslove Predstavničkog doma PSBiH s novoimenovanim ambasadorima BiH

Sastanak s novoimenovanim ambasadorima BiH održan je 27.2.2013. U ime Komisije za vanjske poslove sastanku su prisustvovali: predsjedavajući Komisije za vanjske poslove Mirza Kušljugić, drugi zamjenik predsjedavajućeg Zvonko Jurišić i sekretar Komisije Merdžana Iglica.

Od novoimenovanih ambasadora BiH na sastanku su bili:

1. Boro Bronza, novoimenovani ambasador BiH u Švicarskoj, i
2. Borislav Marić, novoimenovani ambasador BiH u Kini.

Mirza Kušljugić izrazio je zadovoljstvo time što može čuti njihovo viđenje onoga što ih očekuje u zemljama u koje idu, te što smatraju da bi im Parlamentarna skupština BiH i Komisija za vanjske poslove mogli olakšati posao u ostvarivanju ciljeva koji su pred njih postavljeni.

Boro Bronza, novoimenovani ambasador BiH u Švicarskoj, upoznao je članove Komisije sa stanjem u švicarskoj politici i ekonomiji, posebno bankarstvu, koje se restrukturira, te s činjenicom da Švicarska sada provodi projekat naučnog istraživanja o brojnosti i strukturi bh. dijaspore.

Predsjedavajući Komisije upoznao je ambasadora da su u posjeti Komisiji bili švicarski parlamentarci, te da postoji poziv za uzvratnu posjetu i da bi to bilo važno realizirati. Naglasio je i da Komisija insistira na razvoju parlamentarne diplomatije kao komplementarne diplomatije onoj koju vodi Predsjedništvo i Ministarstvo vanjskih poslova, pa su ambasadori u tim zemljama važna uporišta za to. Prioritet Komisiji je regionalna saradnja, a odmah iza nje su euroatlantske integracije, gdje je prioritet Njemačka, s obzirom na dosadašnju aktivnost, posjete parlamentaraca i grupe prijateljstva. Nakon toga na red dolaze odgovori na pozive za posjete, jer je to sastavni dio diplomatske kurtoazije.

Borislav Marić, novoimenovani ambasador BiH u Kini, upoznao je Komisiju da je već bio ambasador u Kini, a zadnje tri godine bio je direktor jednog predstavništva u Kini, pa je poznaje i kao diplomata i kao privrednik. Sada, nakon kongresa na kojem se potvrđuje novi predsjednik kineske vlade, odlazi u Kinu vidjeti šta se može uraditi u smislu privredne saradnje, a sa iskustvom koje je stekao u privrednom predstavništvu. Naglasio je da bi tu bila važna kvalitetna podrška izvršne vlasti BiH kako bi se dobila posjeta predsjednika Nacionalnog kineskog kongresa, koji je u biti drugi čovjek Kine. Važna je privreda, ali Kinezi veliki značaj daju dobrim političkim odnosima iz kojih se potom generiraju i privredni odnosi. Zato bi bilo važno organizirati neku posjetu na visokom nivou, jer bi to promijenilo i poziciju Bosne i Hercegovine u privrednom smislu.

Predsjedavajući Komisije istaknuo je važnost da iz Ambasade BiH u Kini dobijemo kvalitetne informacije, kvalitetnu analizu firmi koje se pojavljuju na našem prostoru, jer

mnogi naši privrednici ne razlikuju ili ne razumiju razliku u firmama. Često nema prave informacije šta je to što se ovdje pojavljuje kao kineska investicija, kineski privredni subjekt, kojeg je on kvalitativnog nivoa i slično. Jer, riječ je o velikoj zemlji i velikoj kvalitativnoj lepezi privrednih subjekata, tako da je teško znati jesu li oni kineski ili kineski s licencom, koje su im poslovne reference, koji je njihov kvalitativni bonitet. Dobro je da Ministarstvo vanjskih poslova BiH zna koje su to firme koje se pojavljuju na našem prostoru: u oblasti energetike, infrastrukture, željeznica..., jer one nude kredite, investicije, a nama nedostaju informacije o njima. Važno je znati kako oni rade u svijetu, jer mi ovdje imamo informacije iz treće ruke. Danas je od posebne važnosti za Bosnu i Hercegovinu tzv. *business intelligence*, a ambasada je mjesto gdje bi se mogle dobiti kvalitetne informacije o tim i takvim, stvarnim ili potencijalnim, kineskim privrednim partnerima. U tom smislu, bilo bi prioritetno da ambasada digne privredni dio diplomatije na nivo servisiranja bh. privrede pouzdanim informacijama.

Predsjedavajući Komisije **Mirza Kušljagić** na kraju se zahvalio ambasadorima, poželio im uspjeh u poslu koji ih čeka, naglasivši da i ubuduće očekuje dobru saradnju, posebno u segmentu parlamentarne diplomatije.

SEKRETAR
KOMISIJE
Merđana Iglica

Dostavljeno:

- Komisiji za vanjske poslove Predstavničkog doma PSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- Ministarstvu vanjskih poslova BiH
- a/a